

Vernissascha dal cudesch «Die Giacomettis – Eine Künstlerdynastie»

■ (cp) Il num Giacometti vegn associà en emprima lingia cun il dissegner, pictur e sculptur Alberto Giacometti (1901–1966). Main enconuschentas èn las prestaziuns artisticas dals trais proxims parents Giovanni, Diego ed Augusto sco er ils meritis da ses frar Bruno en l'architectura e da ses cusrin Zaccaria Giacometti en il dretg public. Da quai tracta ina publicaziun ch'è cumparida dacurt. L'ovra «Die Giacomettis – Eine Künstlerdynastie» è vegnida realisada en il rom dal project «Centro Giacometti» e s'occupa da l'istorgia da la dinastia dals Giacomettis. La publicaziun è documentada cun var 350 illustraziuns e cun bleras perditgas, che n'èn betg vegnidas publitgadas fin ussa, e preschenta las personalitads da la famiglia Giacometti sco er las personas che han vivì cun ellas. Cun quest cudesch prestan las auturas ed ils auturs spezialisads ina contribuziun impurtanta a favur da l'istorgia da la famiglia d'artists renumads da la Bregaglia.

Il cudesch cun bleras illustraziuns elavurescha per l'emprima giada l'origin complex da la famiglia Giacometti sco er l'impur-

tanza decisiva da la lingia materna. Ultra da quai vegnan descrittas l'istorgia e l'expressivitat d'ina cuntrada muntagnarda grondiusa che ha influenzà ils patratgs dals artists. Las explicaziuns vegnan cumplettadas cun texts biografics d'auturs renumads davart ils sis Giacomettis: Giovanni, Augusto, Zaccaria, Alberto, Diego e Bruno.

A chaschun da la vernissascha dal cudesch, che ha lieu en la biblioteca chantunala, vegn l'ovra preschentada ed undrada, tranter auter cun in referat dal cunautur *Andreas Kley* davart il tema «Die Giacomettis – Bündner Brücken zur Schweiz und zur Welt». L'occurrentza è publica. Glindesdi, ils 8 da december 2014, a las 18.00, biblioteca chantunala, Karlihofplatz, Cuir

Il cudesch

«Die Giacomettis – Eine Künstlerdynastie», edì da la fundaziun Centro Giacometti. Auturas ed auturs: *Fritz J. Dold, Roland Frischknecht, Marco Giacometti, Andreas Kley, Paul Müller, Viola Radlach, Jacqueline von Sprecher, Ottorino Villatora e Véronique Wiesinger*. Cumparì en la chasa editura Salm, Wohlen (BE).